

# **KAYO PO BA ANG HARI NG KAGUBATAN? BERSYON NA PANG-BIGKAS para sa 9 na katao**

**Ni Penny Reyes-Velasco**  
Salin sa Pilipino ni Rene B. Javellana, S.J.

---

**BATA: Kayo po ba ang hari ng kagubatan?**

**Hindi ako ang hari, kundi abang KABUTI lamang.**

Pagkain ko ang nabubulok na balat ng puno  
Na nakalatag sa kagubatan.  
Kapag busog na ako, pinapakain ko ang mga puno  
Upang lumaki silang may katatagan

Kahit na ako ay paslit,  
Ang pinakamainam ang binibigay ko sa kanila -  
-- Pinakamalinis na tubig, at pinakasariwang hangin  
Nang sila'y mapalaki, sa abot ng aking makakaya.

**BATA: Kayo po ba ang hari ng kagubatan?**

**Hindi ako ang hari, kundi isang SALAGINTO.**

Lipad dito, lipad doon, kahit saan napapadpad sa paghahanap-buhay  
buong araw,  
Dala-dala ang mga hiyas sa aking likod  
Habang ngumunguya ng mga dahong ligaw.

## **TAGAPAGSALAYSAY**

Ngunit bago makalipad at makapagtago ang salaginto,  
Biglang may pumilantik na dilang malagkit.  
Nawala ang salaginto sa isang kisapmatang Maikli pa sa isang saglit.

*Ang Istorya na ito ay mayroong bersyon sa VIDEO CARTOON (tagalog at ingles)*

**BATA: Kayo po ba ang hari ng kagubatan?**

**Hindi ako ang hari, kundi isang PALAKA.**

Gamit ang mahahabang mga paa,  
Patalun-talon ako  
Habang ako'y naghahanap ng mga Umuugong na langaw.

Subalit ang talagang gusto ko'y  
Malinamnam na salaginto;  
Buti nalang at sa aking harapan  
Mayroong dumalaw

Mula sa mga dahon, nakarinig ako ng gutom na sitsit ng ahas.  
Kaya sambit ko, "ingat ka palaka, balat mo'y tiyak na makikita."

Biglang lumitaw nga ang ahas,  
nakabuka ang bunganga.  
Sabi ko sa palaka, "dito ka magtago!  
Dali, talon, palaka!"

**BATA: Kayo po ba ang hari ng kagubatan?**

**Hindi ako ang hari, kundi isang AHAS.**

Hindi totoo ang akalang ako ay masama raw.  
Kung kailangan lang, saka ako umiinom at tumutuklaw.  
Sapagkat maliit ang ipin ko,  
hindi ako ngumunguya,  
Kaya't paborito kong pagkain ay maliit na palaka.

**BATA:**

Parang tubig na gumapang ang ahas,  
namamaalam sa akin.  
Ngunit bago siya umalis sinabi niyang sa agila  
siya'y matakutin.  
Tumingala siya't tumanaw sa itaas ng mga  
puno  
Hanggang sa mga ulap sa langit  
Nang bigla siyang hinablot ng mga paa ng  
isang ibong mandaragit!.

**Kayo po ba ang hari ng kagubatan?****Hindi ako ang hari, kundi isang AGILA.**

Pumapagaspas ang malalapad kong bagwis.  
Sa bughaw na tahananang langit,  
ako'y humahagibis.  
Naghahanap ako ng maraming pagkain  
Pagkat hindi lang ang sarili ko  
ang aking pakakainin.

Umuuwi ako sa gubat sa punong aking  
kinagigiliwan.  
Doon kasi naghihintay ang aking mga inakay.  
Itong ahas na nadagit ko't aking dala-dala,  
Pagsasaluhan namin sa puno ng mga inakay  
ko't asawa.

**BATA: Kayo po ba ang hari ng kagubatan?****Hindi ako ang hari, kundi isang MURANG PUNO.**

Ilang pamilya ng ibon ang sumisilong sa aking  
mga dahon.  
Ngunit kung hahayaan mo akong lumaki nang  
tatlumpu o higit pang mga taon,  
Di mabilang na hayop ang sa aki'y iyong  
matatagpuan – kung ako'y pababayaang  
sumigla at magkagulang.

Pataas nang pataas, uunat ang aking mga  
sanga.  
Mga katabi'y makakadaupang-dahon  
Upang humabi ng matibay na bubong.  
Samantala, sa sahig ng gubat mga ugat ko'y  
gagapang, palayo nang palayo, na hindi  
namamalayan.

**BATA: Kayo po ba ang hari ng kagubatan?****Noong unang panahon, naging hari ako ng mundo. Ngunit naging masamang hari ako. Ang tawag sa akin ay TAO.**

Sa pagtanim ko, nagpunla ako ng makakain  
ng maraming tao.  
Ngunit ang mga puno sa kabundukan  
ay pinutol at sinunog ko.  
Hindi nagtagal, wala nang sumibol sa lupa.  
Wala na roong matagpuan, kahit kabuti man  
lang.

Para makaipon ng kahoy, angaw-angaw  
na puno ang pinutol ko.  
Hanggang sa halos wala nang natira sa gubat  
kundi ako.  
Lumuha ako nang nakita ko ang aking  
kamalian  
At ang pagmamalupit ko sa lupa'y  
pinagsisisihan ko nang lubusan.

Ako'y nagtanim: bawat buto ay kapalit ng isang  
punong patay.  
Dito sumibol ang mga murang punong taglay  
ang bagong buhay.  
Ito na ngayon ang mga punong iyong  
nasisilayan.  
Pakiusap ko'y huwag nyo silang saktan; sila'y  
iyong hayaan.

Hari ako noon nang matagal na  
matagal na panahon.  
Ngunit ngayon, hindi na ako hari.  
Ang tunay na hari ng kagubatan,  
tiyak kong iyong matatagpuan –  
Mabait siya at banayad at puno ng  
karunungan.

**BATA: Kayo po ba ang hari ng kagubatan?****Kung lalapit ka sa akin, ang sagot ay iyong m a t u k l a s a n . A k o ' y P U T O L N A T R O S O , matanda pa sa kabundukan.**

Noong unang panahong nabubuhay pa ang  
matatandang puno,  
Ako ang pinakamataas sa lahat, at sa akin  
lahat ay nakasalig.  
Sabi nila sa akin, ako raw ay haring walang  
trono.  
Ngayon ikaw nga'y nagpapahinga sa dating  
paanan ko.

Halika, lumapit ka sa akin.  
Magpahinga ka sa kadungan ko.  
Pagkat may lihim na dapat sabihin,  
sa iyo at tanging sa iyo.

Ang tunay na hari ng kagubatan ay  
nagmamahal sa lahat, malaki man o maliit.  
Kaisa siya ng lahat dito sa mundong nag-iisang  
tahanan natin.

Tinitiyak niyang puno ng pag-ibig  
ang mga binhi niyang alaga,  
Nang ang bawat sisibol na bagong puno  
ay mapuno ng buhay na sa langit mula.  
Ngunit ang mga tutubo'y mga binhi lang na  
mula sa mga puno kong matanda.  
At pag-ibig ang bubuhay sa kanila.

Ngayon, buksan mo ang iyong palad, binibigay  
ko sa iyo itong butil.  
Nadarama ko ang pag-ibig sa iyong puso, at  
marami pang dapat gawin!  
Kailangan ng gubat ang tulong mo, kaya  
magtanim ka ng isa o dalawang puno.  
At kahit mahirap paniwalaan, may magandang  
balita ako para sa iyo:  
Ikaw any hari ng kagubatan ---  
Oo, totoong totoo!

## **BATA: AKO AY HARI NG KAGUBATAN!**

O, binhi ng pag-asa sa aking palad,  
Sa'yo ko naaaninag ang bukas ng aming  
bayan.  
Nakikita ko rin ang di iilang mga anak sa  
sugatang mundong ating kinalalagyan ---  
Nagmamahal sa lahat nang bagay, munti man  
o dakila,  
Nabubuhay nang matiwasay, sa lahat nakiki-  
isa.

Di magtatagal, at ang ating mundo ay lalong  
gaganda,  
Hitik na hitik sa mga punong hanggang sa  
abot-tanaw makikita.  
Kung kailangan man ng isang daang taon,  
maghihintay ako nang matiyaga,  
Sapagkat balang araw, malapit na, matutupad  
din ang lahat ng inaasa...